

शब्द कोश

अन्य जातियोंक मैस

उं मैस जो यहूदी न्हैतिन। यहूदी मैस समझछी कि परमेश्वर केवल हमुकें प्रेम करनी, पर सांचि मिं प्रभु यीशु अन्य जातियोंक मैसों कें लै बचूणक लिजी यौ दुनी मिं आई।

अरामक दिन

जसिक परमेश्वरल छै दिनों मिं सॉर संसारक रचना करणक बाद सतूं दिन अराम करौ, उनुल मैसों धैं लै उस्सै करणक लिजी कौ। अरामक दिन हर शुक्रवार सांस पड़ि बे शनिवार सांस पड़ि तलक हुंछी। उ दिन मैस सभा घर मिं जैबेर परमेश्वरक वचन सुणछी, और क्वे काम नि करबेर अराम करछी। लेकिन यीशुक बखत मिं धर्म गुरुओल आपण कठिन नीम-कानूनोंक जरियल यैक असली अर्थ कें बदेइबेर आपण मनगढ़ंत कहानी बणै दे।

इब्राहीम

इब्राहीम यहूदी मैसोंक कुल पितर छी। उकें परमेश्वरल ऊर देश (जकें आज-कल ईराक कूनी) बे, कनान देश (जकें आज-कल इस्रायल कूनी) मिं जाँणक लिजी कौ। परमेश्वरल उधैं वैद करौ कि त्यर बंश भौतै बढल, और यौ पुर देश तुमर ह्वल। यौ वैद पुर हुणक लिजी इब्राहीम कें भौत लम्ब बखत तलक इंतजार करण पड़ौ। जब उ सौ सालक हौ, तबै वीक च्यल इसहाकक जनम हौ।

इस्रायल

इस्रायल इब्राहीमक नाति याकूबक दुसर नाम छी, यैक लिजी इब्राहीमक वंशजों कें इस्रायली कुनी। याकूबक बार च्याल छी, यैक लिजी इस्रायली बार गोत्र मिं बट ग्याछी। जब उं मिस्र बे छुटकार पैबेर परमेश्वरक वैद करी देश मिं पुर्जी,

तब उ देशक नाम इस्रायल है गोय। दाउद रॉजक बखत मिं इस्रायल एक ताकतबर देश छी। लेकिन वीक च्यल सुलेमानक मौतक बाद पुर देश द्वी भागों मिं बट गोय। अब उत्तरी भाग इस्रायल और दक्षिणी भाग यहूदा कई जांछी। यैक लिजी इस्रायलियों कैं यहूदी लै कई जां।

इस्रायली बॉर-बॉर परमेश्वरक बात निं मानछी और उनुकैं छोडबेर दुसॉर द्याप्तोंक पुज करण लॉगछी। यैक लिजी परमेश्वरल उनॉर सामण बॉर-बॉर दुश्मण ठाड कर देई जैल उं फिर वापस परमेश्वरक पास लौट आओ और सांचि मनल मन फिराव करो। यीशुक बखत मिं इस्रायलियों मिं रोमियोंक राज छी। उं आणण बारि मिं छुट-पुट फैसॉल कर सकछी। पर यौ बातक फैसॉल रोमी करछी कि उनर रॉज को हवल और उनुकैं रोमी शासकों कैं चुंगी लै दिण पड़छी।

एलियाह

एलियाह परमेश्वरक सेवक और नबी छी, जैल परमेश्वरक बचनोंक बारि मिं मैसों कैं बता। उ लगभग आठ सौ पचास साल ईसा पूर्वक बखत ज्यून छी।

खतना

इब्राहीमक बखत बे परमेश्वरक तरफ बे यौ हुकुम हौ कि हर यहूदी

जातिक बैगोंक खतना हो। जब एक च्यल आठ दिनक है जाओ, तब वीक लिंगक खॉल काँटबेर वीक खतना करी जाओ। यौ सबनक लिजी एक निशान छी कि उ च्यल परमेश्वरॉक चुनी मैसों मिं बे एक छु।

दाउद


दाउद यहूदियोंक सबुं है खाश रॉज छी। परमेश्वर यकैं भौत प्रेम करछी। यैल यॉस काम लै करी जो परमेश्वरक नजर मिं खराब छी। लेकिन यैल सांचि मनल पछताव करौ और परमेश्वरल यकैं माफ कर दे। यौ दाउदकैं बंश मिं प्रभु यीशुक जनम हौ।

धर्म-गुरु

धर्म-गुरु धर्म-शास्त्र कैं पढ़बेर वीक बारि मिं ढूढ-खोज करछी, और मैसों कैं यैक बारि मिं सिखूछी। उं यहूदी न्यायालयक सदस्य लै छी। इनॉर द्वी दल छी, फरीसी और सदूकी। प्रभु यीशुक बखत मिं धर्म-गुरु यहूदी समाज मिं खाश छी। उं यीशु कैं देखबेर डरछी कि यैक जरियल हमर पूछ कम है जालि। यैक लिजी उनुल रोमी राजपाल धैं यीशु कैं मौतकि सजा दिणक लिजी दबाव दे।

धर्म-शास्त्र

यहूदी धर्म-शास्त्र तीन खाश भागों में छु। एक मोशेशक जरियल देई परमेश्वरक नीम, और दुसर नबियोंक लेख, जस यशाया, और तिसर इतिहास, गीत और कविता। यौ सब लेख बाइबिल नामक किताब में लै छु, वां उकै “पुराण नियम” कई जां। (बाइबिल में जो हिस्स “नई नियम” कई जां, उ प्रभु यीशु और उनार शिष्योंक इतिहास और लेख छु।)



धर्म-शास्त्र अलग-अलग मवट कागजों में लिखी और मोड़िबेर धरी छी।

नबी

नबी मैस (और क्वे-क्वे स्यैणि लै) हुंछी, जो परमेश्वरक वचन मैसोंक सामण पुजूंछी। भौत बार उं मैसों कैं खबरदार करछी कि अगर तुम पाप बे आपण मन फिराव नि करला, तब परमेश्वर तुमुकैं जरुड़ सजा द्याल।

यैक अलावा नबी हुणीवाल बातोंक बारि में लै बतूंछी। भौत घटना जो यीशुक दगाड घटीं, उनर बारि में परमेश्वरल पैलयै नबियोंक जरियल बतै रॉखछी। यस्सै एक खाश नबी यशाया लै छी।

नरक

जब प्रभु यीशु न्याय करणक लिजी यौ दुनी में वापिस आल, तब जो पापि मैस हवाल, उनुकै सजा दिणक लिजी नरक में खिती जॉल। लेकिन जो प्रभु यीशु में भरौस करूं कि उं हमुकैं बचूणीवाल परमेश्वरक पुत्र छन, उं नरक में निं जाओ।

पतरस

पतरस प्रभु यीशुक बार शिष्यों मिबे एक छी। वीक पैलीक नाम शिमौन छी। यीशु उकैं पतरस कूंछी, जैक अर्थ छु, चट्टान। वील द्वी चिट्ठि लै लिखी जनुमिं उं परमेश्वरक बात समझूं। उं बाइबिलक “नई नियम” में शामिल छन।

परमेश्वर

परमेश्वर पुर दुनी कैं बणूणीवाल छन। उं पवित्र छन और उनुमिं क्वे लै प्रकारक बुराइ न्है। उं महान और सबुहै ठुल छन। फिर लै उं मैसों कैं प्यार करनी। उं पाप नि देख सकन लेकिन पापियों कैं माफि दिणक

लिजी तैयार छन। उं हमुकै हमार पापक मौतक सजा बे बचूणक लिजी यीशुक रूप मिं हमार बीच मिं आई। और प्रभु यीशुक स्वर्ग वापस जाँणक बाद, जो लै उनुमिं भरौस धरुं परमेश्वर उकै आपण पवित्र आत्मा दिनी।

परमेश्वरक तम्बु

जब इस्रायली मैस रेगिस्तानक बाँट उ देश मिं जाणाछी, जकै दिणक वैद परमेश्वरल कर रॉखछी, तब मोशेशल परमेश्वरक तम्बू बना। वां परमेश्वर मोशेशक दगाड भेट करछी, और याजक भेट चढूछी। तम्बु मिं सबों है पवित्र जाँग मिं परमेश्वरक वैदक सन्दूक धरी छी। इस्रायली जां कैं लै जाँछी, उं यौ तम्बू कैं लपेटबेर आपण दगाड लिजाँछी। जब उं कनान देश मिं रुण लागी, तब उनुल तम्बूक बढाँव मिं परमेश्वरक लिजी एक भवन बना।



परमेश्वरक तम्बूक भितेर काम करणी
याजक

परमेश्वरक भवन

परमेश्वरक भवन यरुशलेम मिं परमेश्वरक मंदिर छी, जकै सुलेमान रॉजल आपण बौजू द्वादक मंशाक अनुसार बना। उ भवन मिं याजक धन्यवाद दिणक और पापों बे माफि मिलणक लिजी परमेश्वर कैं भेट चढूछी। यौ भवन भौत ठुल और भल छी। पांच सौ अणसठ ईसा पूर्व वेबिलोनियोंल यहूदियोंक दगाड लडै करबेर यौ भवन कैं बर्बाद कर देछी। बाद मिं यौ भवन कैं दुबारा बनाई गो। यौ भवनक भितेर एक पवित्र जाँग मिं परमेश्वरक वैदक सन्दूक धरी गो। यकै एक पर्दल छिपाई गो, और केवल महायाजक उ पवित्र जाँग मिं साल मिं एक बार जै सकछी। जब प्रभु यीशु सूली मिं मर गई, उ बखत यौ पर्द मलिबे तलि तलक बीचों-बीच फाँट गोय। यौ यौ बातक निशाँण छी कि जो क्वे प्रभु यीशु मिं विश्वास करुं, परमेश्वर और वीक बीच मिं क्वे पर्द निरून। यौ दुसर भवन कैं रोमियोंल यैक थ्वाड बखत बाद नाँश कर देछी।

परमेश्वरक राज

परमेश्वर एक रॉजक चारि आपण मैसोंक हिफाजर और उनर सहार करनी। परमेश्वरक राज्यक मैस उं छन जो उनर नीमोंक पालन करनी और उनुमिं भरौस धरनी। जब

प्रभु यीशु वापिस यौ दुनी मिं आल, उ बखत परमेश्वरक राज पुर और सबनक लिजी प्रकट हवल।

परमेश्वरक वैदक संदूक

परमेश्वरक वैदक संदूक एक लाकड़क सन्दूक छी जैमि सुन चढ़ाई छी। वीक माथि मिं द्वी खाश स्वर्ग दूतोंक मूरती लगाई छी। यौ बगसक भितेर उं द्वी पाथर धरी छी, जनुमिं परमेश्वरक हुकुम लेखी छी। यौ संदूक भौतै पवित्र छी, और उ परमेश्वरक तम्बू मिं (और बाद मिं परमेश्वरक भवन मिं) एक नॉन कम्प मिं धरी गोछी, जां बस साल मिं एक बार महायाजक खाश भेट चढ़णक लिजी जांछी।

पवित्र-आत्मा

पवित्र-आत्मा परमेश्वरक आत्मा छु। जब हम प्रभु यीशु मिं भरौस करण लागनू, पवित्र आत्मा हमर मन मिं ऐबेर हमुकें परमेश्वरक बात समझणक लिजी मधत करुं, और उनर सहारल हम भल काम करबेर पाप करण लै रोक सकनू।

पाणिक बपतिस्मा

पाणिक बपतिस्मा एक रीती छु जो पाणिल ध्वेणक चारि छु।

जब मैस यहूनाक हातल पाणिक बपतिस्मा लिंछी, तब उं यौ करबेर

दिखूँछी कि हम आपण पापों बे मन फिराव करनू। प्रभु यीशुक ज्यून हैबेर स्वर्ग जाँणक बाद, पाणिक बपतिस्मा लिणक खाश मतलब यौ छु कि हम आपण पुराँण बाँट छोड़बेर प्रभु यीशु कैं मानणीवाल बण गोयूं।

पाप

पाप परमेश्वरक नीम कैं नि मानण छु। सबै मैस पापी छन, किलैकि क्वे लै मैस यस न्है जो परमेश्वरक नीमक पालन पुर ढंडल करुं। परमेश्वर हर पाप बे नफरत करनी, चाहे उं देखीणी हो या निं देखीणी। सब पापोंक सजा मौत छु। जब हम प्रभु यीशु मिं भरौस धरनू कि उं हमर पापोंक लिजी मारी गई, तब परमेश्वर हमुकें माफ करनी।

पेंतेकुस्तक त्यार

पेंतेकुस्तक त्यार यहूदी मैसोंक लिजी फसल काटणक त्यार छी। बाद मिं यौ दिन विश्वासियोंक लिजी पवित्र-आत्मा मिलणक यादगारिक त्यार बणौ।

पौलुस

पौलुस पैली एक फरीसी दलक धर्म गुरु छी जो यीशुक विश्वासियों कैं सतूँछी। लेकिन जब यीशुल स्वर्ग बे उधैं बात करी, तब उ लै विश्वास करण लाँगौ। उ एक खाश

प्रचार करणी बणौ जो भौत देशों मिं जै-जैबेर प्रभु यीशुक भलि खबर कैँ मैसों कैँ सुणूछी। वील भौत चिट्ठि लै लिखी जनुमिं उ परमेश्वरक बात समझूं। उं बाइबिलक “नई नियम” मिं शामिल छन। पौलुसक यहूदी नाम शाउल छी।

प्रभु यीशु

प्रभु यीशु परमेश्वरक पुत्र छन। उनुकैँ मसीहा लै कई जां, यैक मतलब छु परमेश्वरक चुनी रॉज। उं हमर मुक्तिदाता छन जनुल मैसोंक पापोंक लिजी सजा भुगती। उं हमेशा परमेश्वर छी लेकिन एक कुवारी बे उनर जनम मैसक रूप मिं हौ। उं मैसोंक जरियल मारी गई, तिसर दिन फिर ज्यून हई और फिर स्वर्ग मिं न्है गई। यौ सब परमेश्वरक मंशाल हौ। उं एक दिन मरियों और ज्यूनोंक फैसॉल करणक लिजी फिर यौ दुनी मिं आल। जो क्वे लै उनुमिं भरौस करल, उ बच जॉल।

प्रार्थना करण

प्रार्थनाक अर्थ छु परमेश्वर धैँ बात करण। प्रार्थनाक जरियल मैस आपण जरवतों कैँ परमेश्वर कैँ बतू, और उनुकैँ धन्यवाद लै दीं। हम प्रार्थना मिं परमेश्वर कैँ सब कुछ बतै सकनू, और उं हमर बात हमेशा सुणनी।

फरीसी दल

फरीसी दलक धर्म गुरु आपण धर्मक पालन पुर रीतिल करछी। यैक लिजी उं आपु कैँ दुसरों बे भल समझबेर घमण्ड करछी। यीशु उनुकैँ कपटी कूछी, किलैकि उं मैसों बे वाह-वाही पाणक लिजी दिखाव करछी। उं भौतै कठिन नीम लै बणूछी, जनर पालन करण मैसोंक लिजी भौत मुश्किल छी।

फसहक त्यार

जब यहूदी मैस मिस मिं गुलामी बे आजाद हई, तब उनुकैँ परमेश्वरल हुकुम दे कि तुम हर साल यैक यादगारीग लिजी एक त्यार मनाया। यौ त्यारक नाम फसहक त्यार छु। फसहक त्यारक बाद मैस एक हप्त तलक बिन खमीरी र्वटवाल त्यार मनूछी। उनुल सबुहै पैली बिन खमीरी र्वट यैक लिजी खा, किलैकी उ बखत उनुकैँ तुरन्त मिस देश बे भ्यार उण छी और उनर पास इतुक बखत निं छी कि उं पिसूं मिं खमीर उठण तलक इन्तजार करो, जस उं रोज करछी। और यौ बातक यादगारिक लिजी उ आज लै यौ त्यार मनूनै। यौ द्वीनों त्यार कैँ मैस फसहक त्यार कूनै।

बलिदान चढूण

परमेश्वरक नीमक अनुसार पापों बे माँफी मांगणक लिजी बलिदान

चढ़ाई जांछी। पाप परमेश्वरक नजर मिं इतुक नक छु कि यैक लिजी बिना खून बगाई हमकें माफि नि मिलन। जब मैस बलिदान मिं जानवर काटनी, उं कुनी कि हमुल पाप करौ और यैक सजा हमुकें मिलणै छु, लेकिन यौ जानवर हमर बदाव मिं मरबेर हमर सजा भुगतूं और यैक लिजी हमुकें माफि मिलेलि। मैस बार-बार पाप करनी, यैक लिजी उंनुकें बार-बार बलिदान चढ़ूण छी। लेकिन यीशुक मौत आंखिरी बलिदान छी, यैक बाद क्वे लै दुसर बलिदानक जरवत न्हैं।

यैक अलावा मैस धन्यवाद दिणक और शुद्ध हुणक लिजी लै भेट और बलिदान चढ़ूछी।

भूत

भूत दुष्ट आत्मा और शैतानक सेवक छन। जब लै भूत मैसक भितेर ऐ जां, तब उ उकें भौतै सतूं। उं मैसों कें चमत्कार लै करण दिंछी, जैल यस लांगुं कि भूत भॉल छन। लेकिन उनर मंशा बस यौ छु कि मैस कें मार दियो। लेकिन प्रभु यीशु मिं मैसों मिंबे भूतों कें निकालणकि शक्ति छु।

मरियम

धर्म-शास्त्र मिं मरियम नामक तीन स्थैणी छन -

1 मोशेशकि बैणी मरियम

2 मरियम जैल पवित्र-आत्मा अंड-भारि हबेर प्रभु यीशु कें जनम दे

3 मरियम मगदलीनी जैल प्रभु यीशु कें ज्यून हुणक बाद सबुहै पैली देखौ।

मसीह

मसीह एक इब्रानी शब्द छु, जैक अर्थ छु “परमेश्वरक चुनी उ मैस जो हमुमिं राज करनी।” प्रभु यीशु मसीह छन। युनानी भाषा मिं “मसीह” कें “ख्रीष्ट” कूनी।

मुक्तिदाता

हरेक मैस पापि छु, और पापक सजा मौत छु। मैस कतुकै कोशिश करबेर लै पाप बे निं बच सकन। यैक लिजी परमेश्वर हमुकें कभै नि अपणै सकन। लेकिन परमेश्वर हमुकें इतुक प्रेम करनी, कि उनुल हमर पापोंक सजा हमर बदाव मिं आपण पुत्र प्रभु यीशु कें दे। यीशु जैल क्वे लै पाप नि कर, हमुकें मुक्ति दिणक लिजी एक मैस बणबेर मर गई। जब हम यीशु कें हमर मुक्तिदाता मॉनबेर उनुमिं भरौस धरनू, चाहे हम कदुक लै पापि किलै निं हुं, परमेश्वर हमुकें माफ करॉल। माफि मिलबेर हम परमेश्वरक नजर मिं धार्मिक छन, और हम मरणक बाद उनॉर दगाड़ हमेशा रूल। यौ

हमर क्वे भल कामक जरियल न्है, केवल उनर दयाक जरियल ह्वल।

मोशेश

मोशेश जब पैद हौ तब यहूदी मैस गुलामी मिं मिस्र देश मिं रुंछी। परमेश्वर वीक जरियल आपण मैस मिस्र बे आजाद करैबेर कनान देश मिं लि गेई, जकें दिणक वैद उनुल उनर पितर इब्राहीम धै कर रॉखछी। परमेश्वरल मोशेशक जरियल मैसों कें आपण नीम लै देई। उ परमेश्वरक सबों है ठुल सेवकों मिं बे एक छी।

यहुन्ना

धर्म-शास्त्र मिं द्वी मैसोंक नाम यहुन्ना छु -

1 यहुन्ना एक गुरु और नबी छी जो प्रभु यीशुक प्रचार करण है पैलि मैसों कें बतूछी कि मुक्तिदाता उणीवाल छु। उ मैसों कें सावधान करछी कि उनर न्याय करी जॉल, और उनुकें आपण पापोंक लिजी पश्चाताप करण पड़ल। जो मैस वीक बात मानछी, वीक हातल पाणिक बपतिसमा लिंछी। आखिरकार हेरोदेश राजपालल उकें मार दे।

2 यहुन्ना जो यीशुक बार शिष्यों मिंबे एक छी। वील यीशुक वचन और कामोंक बारि मिं

किताब लिखी। यैक अलावा परमेश्वरल उकें दिखा कि अंतिम बखत मिं के-के ह्वल। वीक लेख बाइबिलक “नई नियम” मिं शामिल छु।

यहूदियोंक सभाघर

सभाघर यहूदियोंक धार्मिक कामकाज करणकि एक खाश जॉग छी, जां हर अरामक दिन सब मैस मिलबेर प्रार्थना और अराधना करछी और वां उनुकें धार्मिक और पुस्तैनी शिक्षा लै मिलछी। यैक अलावा उ नॉनतिनोंक पढ़ाई-लिखाई करणकि जॉग लै छी। हर गौ मिं एक सभाघर जरूड हुंछी लेकिन ठुल शहरों मिं जादे सभाघर लै हुंछी।



यहूदी

यहूदी इस्रायलियोंक दुसर नाम छु। और जाणनक लिजी “इस्रायल” मिं देखिया।

याकूब

इसहाक जो इब्राहीमक च्यल छी, वीक च्यल याकूब छी। यैक

बार च्याल छी, जनुल यहूदी जातिक
बार गोत्र बणी। यौ च्यालॉक नाम
छन - रूबेन, शिमोन, लेवी, यहूदा ,
इस्साकार, जबूलून, दान, नफताली,
गाद, आशेर, यूसुफ और बिन्यामीन।

याजक

याजक खाश रूपल परमेश्वरक
तम्बू मिं और बाद मिं परमेश्वरक
भवन भितेर भेट चढ़ूछी। यैक
अलावा उं शुद्ध और अशुद्ध मैसोक
फैसॉल लै करछी।

महायाजक उं सबों हबेर ठुल
छी। यीशुक बखत मिं महायाजक
और याजकोंक दुसॉर सैप यीशु कै
देखबेर भौत जलन करण लागी और
उं धर्म गुरुओंक दगाड़ उनर मौतक
लिजी मशौद करण लागीं।



मयायाजक

यूसुफ

धर्म-शास्त्र मिं कइ मैसोक नाम
यूसुफ छु, लेकिन उनु मिंबे यौ द्वी
खाश छन -

- 1 याकूबक च्यल यूसुफ। वीक
भैनोंल वीक दगाड़ जलन और
नफरत करबेर उकै गुलाम
बणैबेर मिस्र देश मिं बेच दे।
लेकिन परमेश्वर वीक दगाड़
छी और उ मिस्र देशक उप-
राज तलक बण गेय।
- 2 यूसुफ जो मरियमक घरवाल
छी, पर उ प्रभु यीशुक बौज्यु
निं छी। मरियमक ब्या हुण
हबेर पैली मरियम पवित्र-
आत्माक जरियल अंड-भारि
छी तब यीशु मसीहक जनम
हौ। यूसुफ लाकड़क कारीगर
छी।


रोमी

प्रभु यीशुक बखत इस्रायल देश
मिं रोमियोंक राज छी। रोम एक ठुल
राज छी जनर अधिकार मिं यूरोप
और मध्य-पूरबोक भौत देश छी।

वेदी

वेदी ढुङ्गल बणाई गेछी। जां मैस
परमेश्वर कै धन्यवाद और आपण
पापों बे माँफी मिलणक लिजी
जानवरोक बली और धूप चढ़ूछी।
पैली सब मैस बली चढै सकछी, पर

मोशेशक बखत बे याजकै चढ़ूछी। वेदी परमेश्वरक तम्बू में छी, और बाद में परमेश्वरक भवन में। परमेश्वरक भवनक वेदी कांसल बनाई गेछी, और यौ भौत ठुलि छी। यैक अलावा एक नाँनि वेदी लै छी, जमिं याजक धूप जलूँछी।



वेदी

शिष्य

जब प्रभु यीशु यौ दुनिं मिं छी, उनॉर बार खाश शिष्य छी, जो यीशुक दगाड रुँछी और यीशुल उनुकै भौतै बातोंक बारि मिं सिखाछी। और इनुलै यीशुक स्वर्ग जाँणक बाद उनेरि बात पुर दुनी मिं फैलै। ऐल जो लै यीशुक बात माननी, उं उनर शिष्य छन।

शुद्ध / अशुद्ध

यहूदी नीमोंक अनुसार कुछ चीजों कै अशुद्ध मानी जाँछी, जनुकै खाण मना छी। जस खून और क्वे-क्वे जानवरोंक शिकार। मैस क्वे

अशुद्ध चीज छुबेर अशुद्ध हुं। जस मुर्द, कवे मरी जानवर। अशुद्ध मैस परमेश्वरक तम्बू या भवन में नि जै सकन। आपुं कै शुद्ध करणक लिजी मैस बली चढ़ूँछी। यीशुल यौ सिखा कि हम कवे खाण खैबेर अशुद्ध निं हुन, पर पाप करणल अशुद्ध हुनूँ।

शैतान

शैतान पैली परमेश्वरक एक स्वर्गदूत छी। लेकिन वील पाप मिं पड़बेर परमेश्वरक बराबरी करणक कोशिश करी। तब परमेश्वरल उकै सजा दीबेर स्वर्ग बे धरति मिं खेडि दे। उ आज सबुधै परमेश्वरक खिलाफ आपण पुज करूण चां, यैकै लिजी उ सबु कै आपण चारि बरबाद करूणक लिजी लागि रं। और वीकि चारि भूत और दुष्ट आत्मा लै छन, जनुमिं शैतान सबों हैबेर ठुल छु।

सदूकी दल

यौ धर्म-गुरुओंक एक दल छी, जो कि सदूकी कई जाँछी। उं दुबॉर ज्यून हुण और स्वर्ग कै निं मानछी। उं फरीसी दलक धर्म-गुरुओं कै भल नि मानछी, लेकिन फिर लै उनर दगाड यीशुक मौतक योजना बणै।


सुलेमान

सुलेमान दाउद रॉजक च्यल और वीक वारिश छी। उ आपण

परमेश्वरक तरफ बे मिली धन-दौलत और बुद्धिमानकी लिजी परसिद छी। वील आपण बौज्यू दाउदक मंशाक अनुसार यरुशलेम मिं परमेश्वरक लिजी एक भवन बणा। जब सुलेमान बुढ है गोय तब उ दुसॉर द्याप्तोंक पुज करण लाँगौ। तब परमेश्वरल रिशैबेर वीक राज्यक द्वी भाग बणै देई। नाँन वॉल सुलेमानक च्यल कै और ठुल वीक विरोधियों कै मिलौ।

सूलीक मौत

जब रोमी क्वे मैस कै मौतक सजा दिछीं, तब उं उकै सूली मिं लटकूँछी। सूली द्वी लाकडों कै कील ठोकबेर बणछी। सिपै कसूरदारक हात और



सूली मिं लतकाई यीशु

खुटों मिं कील ठोकबेर उकै यौ सूली मिं लटकै दिछी। और जब तलक उ निं मर जांछी तब तलक उकै वै लटकाई जांछी। मौतक यौ एक भयंकर रूप छी। यौ सजा खाश कर चोर और खूनियों कै दी जांछी।

स्वर्ग

स्वर्ग उ पवित्र जाँग छु, जां परमेश्वर और उनर स्वर्ग दूत रूनी। प्रभु यीशु मिं भरौस करणी मरणक बाद उनर दगाड़ वां लै रूनी। प्रभु यीशु एक दिन स्वर्ग बे यौ दुनिं मिं फिर आल, और उं सबनक न्याय करॉल। तब एक नई धरति ह्वेलि, जां भरौस करणी हमेशा उनर दगाड रौल। वां न दुःख ह्वल और न मौत।

स्वर्गदूत

स्वर्ग दूत आत्मा छन, जो परमेश्वरक तरफ बे ऐबेर मैसों कै क्वे बात बतूनी या उनेरि मधत करनी। खाश कर उं मैसक रूप मिं परगट हुंनी।

हेरोदेस

धर्म-शास्त्र मिं चार मैसोंक नाम हेरोदेस छु -

- 1 प्रभु यीशुक जनमक बखत रोमियोंल इस्रायल देश मिं राज करणक लिजी हेरोदेस कै

- धर रॉखछी। जब प्रभु यीशु भौ छी, हैरोदेसल उकें मारणकि कोशिस करी।
- 2 वीक च्यल हैरोदेस अन्टीपस। उ गलील प्रदेशक राजपाल छी। वील यहूना पाणिक बपतिस्मा दिणीवाल कैं मरवाछी। उ यीशु कैं मौतक सजा दिलूण मिं शामिल छी, लेकिन यौ बात यौ किताब मिं नि बताई गई। तुम यकैं हिन्दी
- बाइबिल में पढ़ सकछा।
- 3 रॉज हैरोदेस अग्रिप्पा जो हैरोदेस रॉजक नाति छी। उ यीशुक विश्वासियों कैं सतूछी। वील यीशुक खाश शिष्य याकूब कैं मरवाछी, और पतरस कैं जेल मिं खितछी।
- 4 वीक वारिश रॉज हैरोदेस अग्रिप्पा दुसर। उ पौलुसक न्याय मिं शामिल छी।